

thesaurum totius Ægypti & Arabiæ. A Crack duæ numerantur leucæ (secundum aliud exemplar, *duæ diætæ*) ad *Areopolim*, eundo versus Vulturum, quæ nunc *Petra* dicitur, & est metropolis totius Arabiæ secundæ. Olim verò *Ar* vocata est, sita in torrente Arnon, in confinio Moabitarum, Ammonitarum & Amorrhæorum. In eodem littore est locus, ubi Balaam ductus fuit in montana Moab, ut malediceret filiis Israël, Num. xxii. 41. A Jericho quinque sunt leucæ contra Austrum ad oppidum *Segor*, sub monte *Engaddi* positum, inter quem montem & mare Mortuum est *statua salis*, in quam uxor Lot fuit conversa, Gen. xix. 26. pro qua videnda multum subii laboris, sed incassum: nam averterunt me Saraceni, dicentes locum non carere periculo propter serpentes, vermes, & feroces bestias ibi habitantes: sed postea comperi rem non ita se habere. Et nota, quòd *Mare Mortuum* ab Oriente in Occidentem, quæ est latitudo ejus, habet quinque leucas, in longitudine verò, quæ est ab Aquilone ad Austrum, habet quinque diætæ: ut mihi Saraceni retulerunt. Alii tamen aliam assignaverunt longitudinem. Scribit patriarcha Hierosolymitanus, qui sæpè locum illum invisit, mare illud semper fumum reddere, & nebulam in modum camini infernalis: unde tota illa vallis, quæ aliquando ob sui fecunditatem & amœnitatem *illustris* dicta fuit, ad spatium dimidiæ diætæ sterilis & inutilis reddita est, ita ut nec ullum germen proferat ferè per spatium quinque leucarum, nisi juxta civitatem Jericho, ubi horti irrigantur à fonte Elisæi. A dextris & sinistris hujus maris, montes steriles & aridi cernuntur, nam quocunque vapor à mari illo ascendens impellitur, ibi terræ nascentia non secus quam si à pruina fuissent tacta emoriuntur. In quo districtum Dei judicium nobis ob oculos ponitur, qui tam severè grandia illa Sodomorum peccata usque in hodiernum diem non desinit punire. Nec nisi visa hic scribo. Dixerunt mihi Saraceni, *Jordanem* ingredi *Mare Mortuum*, & rursus egredi, sed post exiguum intervallum à terra absorberi. Excrescit interdum Mare illud ex resolutione nivium de Libano & pluvii cadentibus in Galilæa, in monte Galaad, terra Moab, Ammon & Seir, quæ aquæ omnes in Jordane confluunt, & in *Mare Mortuum* emittuntur. Invenitur in eo *bitumen*, collectum de fundo ejus, quod agitante vento sibiipso cohaeret, & littori appulsum in magna legitur quantitate. Est autem medicinale & durum, nec resolvi potest, nisi in sanguine menstruo, appellaturque *gluten Judaicum*, & ab eo *lacus Asphalti*, id est, *bituminis* appellatur. De quo in Genesi ita legimus, Cap. xiv. 10. *Vallis sylvestris*, quæ nunc est Mare salis, habebat puteos multos bituminis. Hi putei usque in hodiernum diem cernuntur in littore ejus, habentes singuli *pyramides* erectas, id quod oculis meis vidi. Id tantum de isto Mari. A Galgala tres numerantur leucæ, similiter à fonte Elisæi contra Aquilonem, à latere Septentrionali montis Quarentanæ ad civitatem *Hai*, quam expugnavit Josua Jos. viii. Ab *Hai*, ferè una leuca contra Aquilonem est *Bethel* civitas, quæ olim *Luza* dicebatur, Gen. xxviii. 19. in tribu Benjamin, ubi Jacob in Orientem à facie fratris sui Esau fugiens dormivit, & supposito capiti suo lapide, vidit in somnis scalam stantem super terram, & cacumine suo coelos tangentem: ubi & erexit lapidem in titulum, vocavitque nomen loci illius *Bethel*, Gen. xxviii. 12, 18, 19. Et hic erant hi, qui dicunt hæc Hierosolymis facta. Ostenditur autem adhuc juxta *Bethel* lapis ille in titulum erectus, una cum sepulchro Deboræ nutricis Rebeccæ, Gen. xxxv. 8. A *Bethel* una est leuca eundo contra Aquilonem versus *Rama*, quæ *Silo* dicitur, ad palmam Deboræ, uxoris Lapidoth, quæ judicavit Israël, & misit Barach ad pugnandum contra Sisaram in monte Thabor, Jud. iv. 5, 6, 7. A *Bethel* per duas leucas non longè à Rama Benjamin, est *Anathoth*, viculus sacerdotum, de quo Jeremias propheta fuit oriundus, Jer. i. 1. Juxta *Anathoth* inter Orientem & Austrum incipit *desertum* illud, quod est inter Jerusalem & Jericho, quod nunc *desertum Quarentanæ* dicitur, & extenditur usque ad mare Galilææ, & usque ad desertum Thecux & Engaddi juxta mare Mortuum. A *Segor* supra Mare Mortuum ad unam leucam est *ascensus montis Engaddi*, ubi David aliquando latitavit, quum à Saul hostili animo quætereretur, 1 Sam. xxiv. 1, 2. Ibi quoque in circuitu montis fuit *hortus Balsami*, sed tempore Herodis Magni Cleopatra regina Ægypti, in odium ipsius Herodis annuente Antonio, transtulit illum